

M532: St. Galler (mittelrheinisches) Passionsspiel

0,1 hoere heilige kristenheit
0,2 dir wirdet noch hiute vüre geleit
0,3 wie aller der werelte schepfær
0,4 mit zeichenen offenbære
0,5 dâr zuo mit heiliger lêre
0,6 unde ouch mit grôzer sêre
0,7 gewandelt hât ûf ertrîche
0,8 unde wart gemartelt durch dich
0,9 daz merke wole mit sinnen
0,10 die rede sol gewinnen
0,11 wie er ûz wazzer machete wîn
0,12 sô – dû an der rede sîn
0,13 wie er von sancteme Johanne
0,14 den vile heiligen manne
0,15 getoufet wart in den Jordâne
0,16 daz solent ir alle wole verstân .
0,17 ich biten dich – unde dîn kint
0,18 daz ir zuo mîner brütlöufte sint
0,19 sô bin ich iemer mê gemeit
0,20 wirdet mir dise bete niet verseit
0,21 ich unde mîn vile lieber sun
0,22 wollen dînen willen tuon
0,23 nû rât mîn vile lieber sun
0,24 wie dirre briutegome sole tuon
0,25 der uns zuo ime geladen hât
0,26 wan sîn herze in klage stât
0,27 daz er gebresten wînes hât
0,28 nû gip ime dînen rât
0,30 reinez wîp unde muoter mîn
0,31 waz rüeret mich der breste sîn
0,32 wan mîn zît en kommet niet noch
0,33 vüllent die krüege mit wazzer doch
0,34 unde heizent zuo êrste schenken an
0,35 über tische den hôhesten man
0,36 – vile lieber meister mîn
0,37 daz dû gebites daz sal sîn
0,38 allez diz lant hât einen siten
0,39 den hâs dû hier gemiten

0,40 man gît zuo êrste den bezzisten wîn
0,41 sô die liute danne trunken sîn
0,42 sô ist in zuo den tranke gâch
0,43 nû setzes dû den bezzern nâch
0,45 ich bin Johannes genant
0,46 unde tuon aller der werlte bekant
0,47 daz gotes rîche uns nâhet
0,48 daz râten ich daz ir nû gâhent
0,49 unde bezernt iuwer leben
0,50 wollent ir zuo gote streben
0,51 ir solent iuch töufen lâzen
0,52 sô bereitent ir die strâze
0,53 daz zuo iuch der heilige Krist
0,54 wile selber gên in kurzer vrist
0,55 gênt ir zwêne dort hin danne
0,56 unde bitent jenen man
0,57 daz er uns wolle machen kunt
0,58 wer er sî zuo dirre stunt
0,59 vile guoter man wir biten dich
0,60 daz dû uns sages wêrlîche
0,61 ob dû sîst Elias
0,62 lîber vriunt nû sage uns daz
0,63 mit wârheit ich iuch sagen daz
0,64 ich bin niet Elias
0,65 sô sage uns aber in dirre vrist
0,66 ob dû sîst der wâre Krist
0,71 ir vrâgent ob ich sî Krist
0,72 sô sprichen ich daz die wârheit ist .
0,73 daz ich wole gerne wolte
0,74 daz ich nâch wurde solte
0,75 entknüpfen ime die riemelîn
0,76 die umbe sîne schuohe sîn
0,77 des bin ich unwirdic gar
0,78 wan er wiset offenbâr
0,79 sô nimen ich abe sêre
0,80 des habe er iemer êre
0,84 sît dû niet – bist
0,85 noch der wâre heilant Krist
0,86 sô sage uns wie dû sîst genant
0,87 daz wir ez vürebaz tuon erkant
0,88 den die uns zuo dir hânt gesant
0,92 ich bin ez eine stimme die dô rüefet
0,93 unde in der wüeste gêt
0,94 ir solent bereden gotes wege
0,95 wer nû mînes râtes wile pflegen
0,96 der sal den touf entvâhen
0,97 wile er zuo gote nâhen
0,98 sît wir zuo gotes rîche

0,99 nâhen sicherlîche
0,100 mit dem toufe sô kêre her
0,101 unde töufe uns alle zuo diser ger
0,102 ich töufen iuch alle gemeine
0,103 in des namen eine
0,104 der schiere nâch mir komen sal
0,105 der saget iuch die wârheit wole
0,108 sehent in mit ougen an
0,109 von den ich vore gesprochen hân
0,110 er ist daz gotes lamp vore wâr
0,111 daz der werlte sünden ze wâr
0,112 unde allen unsern schaden
0,113 hât gar ûf sich geladen
0,115 île unde töufe mich zehant
0,116 sô gesegenen ich dich
0,117 hêrre daz – dû mich erlân
0,118 den touf ich gerne von dir hân
0,121 lâ die rede sîn Johan
0,122 unde töufe mich vile heiliger man
0,123 sô wirdet alle gerehticheit
0,124 ervüllet daz sî dir geseit
0,125 mit welichen Worten ez geschiet
0,126 sô töufen ich dich in pfliht
0,127 wan dû ez niet wilt entbern
0,128 sô tuon ich ez doch vile ungerne
0,132 hier töufet einen hêrren sîn kneht
0,133 daz ist der diemüeticheite reht
0,134 der . heilige geist in lêret
0,135 sîn vater in ouch êret
0,136 der rüefet mit lûtem schalle
0,137 daz er ime wole gevalle
0,139 wollent ir nû mit zühten gedagen
0,140 sô wile man iuch nû sagen
0,141 wie des tiuvels schalcheit
0,142 – in der wüestenheit
0,143 versuochte in drîer hande wîs
0,144 des wolte er haben grôzen prîs
0,155 bist dû gotes sun aleine
0,156 sô sprich daz dise steine
0,157 zuo dirre stunt werden brôt
0,158 sô büezes dû des hungers nôt
0,162 die heilige schrift uns daz vore jihet
0,163 daz an dem brôte aleine niht
0,164 lige des mennischen leben
0,165 daz . ime von gote ist gegeben
0,166 sîn heil baz an deme stât
0,167 daz von gotes munde gât
0,168 bist dû der wâre gotes sun

0,169 sich sô – dû alsô tuon .
0,170 unde – dich dâ hin nider lân
0,171 wan wir von dir gelesen hân .
0,172 daz dich zehant der engel treit
0,173 dâr umbe geschihet dir niemer leit
0,176 vervluocheter armer satanân
0,177 von disen reden – dû lân
0,178 die heilige schrift daz saget wole
0,179 daz niemannd got versuochen sol
0,180 ich vüeren dich ûf disen hôhen berc
0,181 unde zöugen dir aller der werlte werc
0,182 habe mich vore gote unde bete mich an
0,183 sô – dû ez allez hân
0,186 daz ist der heiligen schrifte gebot
0,187 gelöube aleine an einen got
0,188 unde biut ime dienest aleine
0,189 sô wirdet dîn lôn niet kleine
0,190 wê mir daz ich ie wart
0,191 ich hân gevarn eine übel vart
0,192 sît ich überwunden bin
0,193 ich hâte ez allen mînen sin
0,194 mit vlîze dâr ûf gesetzt
0,195 wie ich hæte gelechezet
0,196 mit hôchvart unde mit vrâzheit
0,197 daz ich dich hæte dâr zuo bereitet
0,198 daz dû mich betes an vüre einen got
0,199 des hân ich aller tiuvel spot
0,201 ich bin ein vlætich jungez wîp
0,202 unde tragen einen stolzen lîp
0,203 ich wile mit vröuweden vroelich sîn
0,204 zuo tanzen stêt daz gemüete mîn
0,205 weme vröuwede ist swære
0,206 daz ist mir gar unmære
0,207 – liebe swester mîn
0,208 gestime den wilden muote dîn
0,209 gedenke daz uns got hât gegeben
0,210 in dirre werlt ein krankez leben
0,211 in den wir gedienen solen
0,212 gotes rîche ob wir ez wollen
0,213 dâr umbe wende dînen muot
0,214 daz ist dir an der sêlen guot
0,215 swester swîc lâ mich gehoeren
0,216 dû macht wole sîn ein alte toerinne
0,217 dû tætest ez ouch wæres dû als ich
0,218 nû bist dû gar unminniclich
0,219 des muost dû ez ungerne lân
0,220 wan niemannd wile mit dir teil hân
0,223 Pêter unde – koment

0,224 unde volget mir ir solent
0,225 stellen nâch liuten iuwer garn
0,226 unde lâzent daz vischen varn
0,227 ir solent der liute vischær wesen
0,228 wie sie zuo der sêlen genesen
0,230 Pêter wir hân bî wârheit wole vernomen
0,231 daz – nû ist komen
0,232 Krist von den die schrift uns saget
0,233 ein sælic tac hât uns betaget
0,235 wie stolz ist nû mîn muot
0,236 mich dunket der werlte vrôuwede guot
0,237 wir solen springen unde tanzen
0,238 unde ouch mit den knappen ranzen
0,239 der uns niet gerne sehe vrô
0,240 der müeze verbürnen als ein strô
0,241 ouwê – wie ist mir sô leit
0,242 daz dich dîn tôrheit sô verleitet
0,243 hin abe zuo der helle
0,244 ich wæne dîn geselle
0,245 der tiuvel gît solichen rât
0,246 der dîner sêlen übel stât
0,247 – liebe swester
0,248 daz tæte dû mir ouch gesteren
0,249 ich weiz wole daz ist dîn grôzestez leit
0,250 daz dû niet – wesen gemeit
0,251 als ich . nû bist dû grîs unde alt
0,252 der lîp ist dir von alter kalt
0,253 nû ganc spin dînen rocken
0,254 daz dich der tiuvel zocke
0,255 hoerent mit zûhten vürebaz
0,256 man wile iuch erzöugen daz
0,257 wie die juden sprâchen
0,258 unde eine vrouwen vore unsern hêrren brâhten
0,259 die was des ane gesprochen
0,260 sie hæte ire . êwe . gebrochen
0,261 sie tâten ez niet wan umbe daz
0,262 daz sie gein – truogen haz
0,263 dô tet er ire helfe erkant
0,264 des wurden die juden wole geschant
0,265 magister
0,266 gip uns meister dînen rât
0,267 dise vrouwe ire . êwe . gebrochen hât
0,268 Mosis êwe . nâch der wir leben
0,269 hât uns solich gebot gegeben
0,270 daz man die huoren steine
0,271 der selben ist sie eine
0,274 wer âne sünde ist unde âne meine
0,275 der werfe an dise vrouwe einen stein

0,276 merket wie disen ist geschên
0,277 sie hânt – schrift ane gesehen
0,278 iegelicher sach sîne missetât
0,279 dâr umbe die vrouwe ledic stât
0,284 vrouwe ist iemannd hier der dich versteine
0,285 genâde lieber hêrre nein
0,286a –
0,286 vrouwe ouch ich dich niet versteine
0,287 wie ich doch sî der allein
0,288 decheine sünde hât getân
0,289 ganc dû – vürebaz sünde lân
0,290 wir solen aber vürebaz mê .
0,291 mit vröuwede leben rehte als . êr .
0,292 uns kumet des süezen mein zît
0,293 die manken herzen vröuwede gît
0,294 – dises schimpfes ist zuo vile
0,295 uns allen nâhet des tôdes zil
0,296 von den niemannd gewenken mac
0,297 dâr nâch kumet der jungeste tac
0,298 der danne mit vröuweden wile erstân
0,299 der solte sich tôrheit erlân
0,300 wer ir wile lange walten
0,301 der wirdet von gote gescholten
0,302 ouwê der leidn mêre
0,303 die sint mir alzuoz swære
0,304 . êr ich verlüre mînen got
0,305 ich lieze . êr . aller der werlte spot
0,306 nû gip mir swester dînen rât
0,307 wie gebüezen ich mîne missetât
0,308 – swester kêre
0,309 zuo – den vile hêrren
0,310 der ist sô milte unde ouch sô guot
0,311 daz er dir troestet wole den muot
0,312 vile lieber meister ich vlêhen dir
0,313 daz dû ezzen woltes mit mir
0,314 wurden ich der bete von dir gewert
0,315 daz dunket mich grôzes guotes wert
0,316 ich dich dîner bete wile gewern
0,317 wan ich sô hætes niet begert
0,318 swester ist dir dîne sünde leit
0,319 sô – dû balde sîn bereit
0,320 wan ich hân wole vernomen
0,321 daz – in dise stat ist komen
0,322 der kan dir geben guoten rât
0,323 umbe dîne grôze missetât
0,324 nû île balde zuo ime hin
0,325 daz wirdet vüre wâr dîn gewin
0,326 – vile lieber hêrre mîn

0,327 ich bin eine grôze süntærinne
0,328 ich hân gesunt alzuo vile
0,329 über aller rehter mâze zil
0,330 daz ist mir innicliche leit
0,331 erzeige mir dîn barmherzicheit
0,332 oder ich bin iemer mê verloren
0,333 ouwê daz ich ie wart geboren
0,334 ich hân grôzer sünden vile getân
0,335 ouwê hæte ich sie verlân
0,336 sô wær mir vilez desten baz
0,337 ach – aller tugende ein vaz
0,338 dû mir dîne helfe schîn
0,339 unde lîhtige mir mînes herzen pîn
0,340 sô wile ich iemer sünde lân
0,341 unde wile in dînere lêre bestân
0,344 alle dîne sünde sîn dir vergeben
0,345 bezzer vûrebaz dîn leben
0,346 wan dîne minne ist alsô grôz
0,347 daz ich noch nie vant dîn genôz
0,348 wâr umbe ist dise salbe verloren
0,349 ez wær bezzer ez wære verboren
0,350 man mohte sie verkoufet hân
0,351 umbe driu hundert pfenninge sunder wân
0,352 dâ mite man manken armmanne
0,353 mohte vile wole hân getân
0,354 ir hânt armer liute vile
0,355 beide nû unde alle zil
0,356 den tuont ir guot swanne ir wollent
0,357 vile schiere ir mich verliesen solent
0,363 wizzet daz des wîbes geloube grôz
0,364 hât sie gemachet von sünden blôz
0,365 – dû – hân ouch mînen sein
0,366 unde ganc in dîn hûs wider heim
0,367 der unverscheiden drîvalticheit
0,368 sî iemer genâde unde êre geseit
0,369 meister genâde sagen ich dir
0,370 daz dû cezzen hât mit mir
0,371 – danken ich dir sol
0,372 daz dû mir ez hât geboten wole
0,374 swîgent mit zûhten an dirre stunt
0,375 sô wollen wir iuch machen kunt
0,376 ein zeichen daz selten ist geschên
0,377 – machet einen blinden gesehen
0,378 der selbe blinde geboren wart
0,379 daz geschach von gotelicher art
0,380 wer wile sich hiute erbarmen
0,381 über einen blinden armen
0,382 der nie gesach den liechten tac

0,383 dâ von ich wole sprechen mac
0,384 blint man arm ist vûre wâr
0,385 beide stille unde offenbâr
0,389 meister wie ist diz geschehen
0,390 daz dirre man niet sal gesehen
0,391 weder ist sîn vater schuldic dâr an
0,392 oder hât er selbe missetân
0,397 wizzet daz des vateres tât
0,398 an ime keine schulde hât
0,399 sô hât er ouch niet getân
0,400 dâr umbe er sole zuo buoze stân
0,401 ez geschach dâr umbe sunder
0,402 daz got an ime schüefe wunder
0,403 nû ganc enwec zuo dirre stunt
0,404 wasche daz abe unde wis gesunt
0,405 grôz wunder ist mir geschehen
0,406 wan ich bin worden gesehen
0,407 swie ich wart geboren blint
0,408 als ir wole wole sint
0,409 wænet ir ob dirre sî daz kint
0,410 daz dô wart geboren blint
0,411 oder ist er ein ander man
0,412 dâ zuo sprechent iuvern wân
0,413 ich jihen dir die wârheit
0,414 ez ist der selbe ûf mînen eit
0,415 meier ez ist einander iemere gelîch
0,416 dâr vore hân ich ez sicherlîche
0,417 dâ darf niemannd zwîveln an
0,418 wan ich bin ez der selbe man
0,419 sô – dû selbe nû verjehen
0,420 wie dû worden sîst gesehen
0,426 der mennische der – ist genant
0,427 der leite mir mit sîner hant
0,428 die speicholter ûf die ougen mîn
0,429 dâ von wart mir genâde schîn
0,430 daz ich gesehen den klâren tac
0,431 der mir vore gar verborgen lac
0,432 dû rehter trûgenær wole danne
0,433 dû muost vore unsern meister gân
0,434 dirre man hât uns verjehen
0,435 – habe in gemachet gesehen
0,436 unde er doch wære geboren blint
0,437 die rede wunderlîche sint .
0,438 wære dû blint unde bist worden gesehen
0,439 sage wie ist dir geschehen
0,445a “der mennische”
0,445 der mennische der – ist genant
0,446 der leite mir mit sîner hant

0,447 die speicholter ûf die ougen mîn
0,448 dâ von wart mir genâde schîn
0,449 daz ich gesehen den klâren tac
0,450 der mir vore gar verborgen lac
0,451 der mennische ist niet von gote
0,452 der wider gotes gebote
0,453 der dir nâch dîner sage
0,454 half an eineme vîrtage
0,455 sô zwîveln ich dâr an sunder
0,456 tuot ein süntær solich wunder
0,457 waz wilt dû aber von deme jehen
0,458 der dich gemachete sehen
0,459 er ist ein prophête vüre wâr
0,460 dâr vore hân ich in offenbâr
0,461 ich gelöuben der rede niet
0,462 die dirre von ime selbem gît
0,463 ruofe sîneme vater her zestunt
0,464 der tuot uns die wârheit kunt
0,465 – kom her zehant
0,466 unser hêrre hât nâch dir gesant
0,467 daz dû im selbem – verjehen
0,468 wie dîn sun sî worden gesehen
0,469 sage uns vüre wâr ist dirre dîn kint
0,470 von den dû sprichest er wurde blint
0,471 ich weiz wole er ist mîn kint
0,472 daz wart geboren alsô blint
0,473 wie aber ime sî geschehen
0,474 daz er worden ist gesehen
0,475 der vrâge er selbe antworten sol
0,476 wan er hât daz alter wole
0,477 wizzet daz durch anders niet
0,478 dirre man zwîvellîche giht
0,479 wanne durch der grôzen vorhte nôt
0,480 die ime der juden drôuwen gebôt
0,481 er hæte sie es wole bescheiden baz
0,482 wan daz sie Krist truogen haz
0,483 gip gote lop unde êre
0,484 hiute unde iemer mêre
0,485 daz dû gesehen worden bist
0,486 wir wizen daz – ein süntær ist
0,487 ich en weiz ob – ein süntær ist
0,488 einez weiz ich wole in dirre vrist
0,489 daz ich mit vorhten verswîgen sol
0,490 ich was êr . blint unde gesihen nû wole
0,491 nû sage uns daz ist unser gire
0,492 wie er habe getân dir
0,493 ich hân iuch ez gesaget êr
0,494 wâr nâch vrâget ir mich mê

0,495 wollent ir iet ûf der erden
0,496 sîne jungern werden
0,497 sprich dû sîst sîn undertân
0,498 sô wollen wir Mosis lêre hân
0,499 mit dem got selbe geredet hât
0,500 sô en wizzen wir niet wannen dirre gâ
0,505 daz ist ein wunder offenbâr
0,506 daz ir niet wizzen kunnet vûre wâr
0,507 wanne er si bekommen
0,508 der mir hât abe genomen
0,509 mîne aneborene blintheit
0,510 ich weiz ouch wole mit wârheit
0,511 daz got niet hoeret die süntær
0,512 sô sint ouch daz gar vrume mæ
0,513 daz ein blinde wart gesehen
0,514 daz wunder ist niet mê geschehen
0,515 die kraft er muoz von gote hân
0,516 mit der er hât daz wunder getân
0,517 buobe dû muost sîn verloren
0,518 wan dû bist in gotes zorne
0,519 unde wilt uns doch alle lêren
0,520 daz muost dû von uns kêren
0,521 unde wîs von uns geschalten
0,522 wilt dû dîn leben behalten
0,523 dû – gelöuben an gotes sun
0,524 wer ist er hêrre daz wile ich tuon
0,525 – daz bin ich daz gelöube mir
0,526 wan er kallet selbe zuo dir
0,527 hêrre ich gelöuben willicliche
0,528 daz dû bist von himelrîche
0,529 unser hêrre gotes kint
0,530 den alle engel dienstbær sint
0,531 dû mohtes anders niet hân
0,532 sô grôz wunder an mir getân
0,533 wollent ir nû gestillen
0,534 sô wolten wir doch mit willen
0,535 sagen unde kunt tuon
0,536 wie – der megede sun
0,537 – den guoten man
0,538 tet von dem tôde ûf stân
0,539 der stankes in dem grabe pflac
0,540 wan er vier tage dinne lac
0,541 dâ mite erwarp er vûrebaz
0,542 ûf sich der übeln juden haz
0,543 hoere – durch dîne zuht
0,544 ich wæne wole ich habe die suht
0,545 von der ich lîden grôze nôt
0,546 ich vûrhte ez sî der grimme tôt

0,547 iedoch wær ich gar wole gesunt
0,548 wær – hier zuo dirre stunt
0,549 Gemelin vile lieber kneht
0,550 tuo mîn gebot sô tuost dû reht
0,551 sage – dem meister mîn
0,552 daz – der vriunt sîn
0,553 von sühten lîde grôze pîne
0,554 vile liebe vrouwe sô mir got
0,555 vile gerne ich leisten iuwer gebot
0,556 – unde – tuont dir kunt
0,557 daz – sî ungesund
0,558 der siechtage bringet niet den tôt
0,559 doch wirdet dâ von gelobet got
0,560 ouwê der jâmerlîchen nôt
0,561 mir ist mîn lieber bruoder tôt
0,562 daz klagen ich hiute unde iemer mê
0,563 ouwê mir tuot sîn tôt gar wê
0,564 wê mir ich bin ein armez wîp
0,565 er was mir lieber danne mîn lîp
0,566 ouwê vile lieber bruoder mîn
0,567 sal ich vûrebaz eine sîn
0,568 daz tuot mir hiute unde iemer wê
0,569 mir geschach nie sô leide mê
0,572 ich sagen iuch an dirre vrist
0,573 daz – tôt ist
0,574 nû wole ûf gên wir dâ hin
0,575 mit einander unde wecken in
0,576 die wîsen arzâte alle lesen
0,577 daz der sieche sî genesen
0,578 sô er slâfen müge wole
0,579 niemannd den siechen wecken sal
0,580 ir solent wizzen offenbâr
0,581 – ist tôt vûre wâr
0,582 nû wole ûf unde gên wir dar
0,588 hêrre wæres dû gewesen hier
0,589 sô wære mîn bruoder tôt noch nie
0,590 doch tuot got waz dû noch wilt
0,591 ich gelöube daz ez in niet bevilet
0,592 dû – wizzen âne wân
0,593 daz dîn bruoder sole erstân
0,594 ich weiz wole daz er danne erstât
0,595 sô die werlt ein ende hât
0,596 ich bin die ûferstende unde daz leben
0,597 swer daz gelöubet den wirdet gegeben
0,598 daz er die helle niemer gesihet
0,599 gelöubes dû daz oder niht
0,600 ich gelöuben daz dû bist
0,601 gotes sun unde heiliger Krist

0,602 der in dise werlt ist komen
0,603 mir unde uns allen zuo grôzen vrumen
0,604 vile liebe swester gelöube mir
0,605 dîn meister ist komen unde rüefet dir
0,608 wâ ist er begraben daz sagent mir
0,609 hêrre kom danne wir zöugen ez dir
0,610 hoerent ir juden alle
0,611 wie iuch mîn rât gevalle
0,612 der einen blinden machet gesehen
0,613 wie mohte den daz leit ie geschehen
0,614 daz sîn lieber vriunt erstürbe
0,615 die wîl ez ime sô grôz leit erwürbe
0,616 grîfent an hebent ûf den stein zestunt
0,617 nein hêrre er stinket als ein hunt
0,618 wan ez ist hiute der vierde tac
0,619 daz er in dem grabe lac
0,620 gelöubest dû der rede mîn
0,621 gotes genâde wirdet dir wole schîn
0,622 ich sagen dir vater genâden vile
0,623 daz dû mich hoerest alle zil
0,624 daz rede ich daz nû werde erkant
0,625 daz dû mich selben hâst gesant
0,627 vile lieber vriunt mîn Lazarê
0,628 stant ûf unde lebe alsô . êr .
0,629 grîfent in an mit handen
0,630 loesent in von sînen banden
0,631 hoerent ir hêrren wunder grôz
0,632 – was unser genôz
0,633 den sach ich sicherlîchen tât
0,634 der selbe als ime – gebôt
0,635 erstuont an den vierden tage
0,636 mit wârheit ich daz sage
0,637 daz bringet die werlt gar in den sin
0,638 daz sie gelöubent alle an in
0,639 die rede betrachtente in kurzer vrist
0,640 sie gelöubent alle daz er sî Krist
0,642 nû hoerent vrouwen unde manne
0,643 ez wile nû an den ernest gân
0,644 die juden gênt zuo râte
0,645 wie sie nû vile gedrâte
0,646 – geben in den tât
0,647 ein kristenmennische betrahte die nôt
0,648 die durch uns hât geliten got
0,657 râtent ir hêrren wie solen wir tuon
0,658 ir sehent wole – sun
0,659 tuot grôze zeichen alsô vile
0,660 beiten wir iet langer zile
0,661 daz volc gelöubet an in gar

0,662 werdent die Rômer daz gewar
0,663 sie vertribent uns von den lande
0,664 dâ von werden wir gesant
0,667 ir hêrren hoerent mînen rât
0,668 daz beide nutz unde wârheit hât
0,669 ez ist wæger einer sterbe
0,670 danne alle die werlt verderbe
0,671 hêrre bischov ir hânt wîsen muot
0,672 der rât dunket mich vile guot
0,678 – dû wunderære
0,679 wir sagen dir lop unde êre
0,680 dû maht der juden küninc sîn wole
0,681 der Israhel erloesen sol
0,682 uns ist die wârheit wole erkant
0,683 daz dich got selbe hât her gesant
0,684 dû bist der werlte heilant
0,685 meister sage uns wâ wilt dû
0,686 daz wir dir bereiten nû
0,687 daz ôsterlamp nâch der juden site
0,688 die gewoneheit wære niet guote vermiten
0,689 ir solent mîn gebot niet lân
0,690 ir solent zuo Jerusalem nû gân
0,691 dô vindent ir einen ein krüegelîn tragen
0,692 mit wazzer den solent ir sagen
0,693 der meister wile dise ôsterzît
0,694 bî dir sîn âne nît
0,695 sô wîset er iuch einen revent wît
0,696 der meister hât dir heizen sagen
0,697 daz er wolle in disen tagen
0,698 daz ôsterlamp bî dir zeren
0,699 des – dû in niet weren
0,700 ouge uns ein hûs daz wir sîn beiten
0,701 unde dô wir ime die spîse bereiten
0,702 ir hêrren die rede ist mir niet leit
0,703 ich wile ez iemer sîn gemeit
0,704 danne ich wile iuch schouwen lân
0,705 ein hûs dô er gemach sal hân
0,706 hier schaffent iuwern willen wole
0,707 dâr zuo ich iuch helfen sal
0,709 man wile begên nû vürebaz
0,710 wie – hiute zuo tische saz
0,711 mit den lieben jungern sîn
0,712 daz er segenete brôt unde ouch den wîn
0,713 als ez von gotelîcher art
0,714 in sînen lîp unde sîn bluot verwandelt wart
0,715 als in der mennischheite noch geschiht
0,716 er wuosch ouch zuo der selben pfliht
0,717 der jungern vuoze mit sîner hant

0,718 dâ mite tet er uns erkant
0,719 daz wir diemuot solen pflegen
0,720 wollen wir daz êwige leben
0,721 des selben tages er sanc
0,722 sîn êrste messe daz habe er danc
0,723 priester unde ander heilicheit
0,724 satzte er der heiligen kristenheit
0,725 daz wirdet iuch hiute vore gesaget
0,726 ezzet daz ir mit zûhten gedagent
0,727 ich hân mit ganzem wille begeret
0,728 des ich nû bin geweret
0,729 ich meine daz ich gesæze
0,730 biz daz ich mit iuch geæze
0,731 daz ôsterlamp doch weiz ich wole
0,732 daz iuwer einer mich verrâten sol
0,733 wê ime daz er ie wart geboren
0,734 wan er ist iemer mê verloren
0,735 – vile lieber meister mîn
0,736 sage mir sal ich ez sîn
0,737 sage mir lieber hêrre mîn
0,738 wer der verredær mûge sîn
0,739 ich sagen dir ez offenbâr
0,740 dû hâst ez gerâten ez ist wâr
0,741 welichem ich gibe daz gemerte brôt
0,742 der selbe verkoufet mich in den tôt
0,746 daz ist mîn lîp der nû wirdet gegeben
0,747 in den tôt durch iuwer leben
0,748 trinkent alle diz ist mîn bluot
0,749 daz ist vore iuwer sünde guot
0,750 ir tuont mînen tôt dâ mite erkant
0,751 swâ ir diz ambaht hier nâch begânt
0,752 waz wollent ir mir zuo guote tuon
0,753 ich giben iuch – – sun
0,754 als wærlîche muoz ich leben
0,755 wir wollen dir drîzic pfenninge geben
0,756 er ist wærlîche woleveile
0,757 doch giben ich in iuch an iuwer seil
0,762 ich wile iuch geben ein niuwe gebot
0,763 daz ir niet brechent durch keine nôt
0,764 ir solent einander lieb hân
0,765 rehte als ich iuch hân getân
0,768 hêrre meister ez sal niet sîn
0,769 daz dû waschest die vuoze mîn
0,772 læzest dû dir die vuoze niet
0,773 waschen hier zuo disere zît
0,774 sô en hâst dû sicherlîche
0,775 kein teil an mîneme rîche
0,778 hêrre die rede sal niet sîn

0,779 wasche niet aleine die vuoze mîn
0,780 wasche mir daz höubet unde ouch die hant
0,781 êr . ich sô tiure würde gepfant
0,783 ir sprechent meister unde hêrre zuo mir
0,784 dâr an niet übel redet ir
0,785 sît ich iuwer vuoze gewaschen hân
0,786 daz hân ich dâr umbe getân
0,787 daz ir niet vürebaz solent lân
0,788 ir wesent einander undertân
0,789 diz zeichen solent ir von mir hân
0,795 ir werdent alle in dirre naht
0,796 von mir vliehente mit maht
0,797 wan ir hânt gehoeret wole sagen
0,798 sô der hirte wirdet geslagen
0,799 sô werdent die schæfelîn verjaget
0,800 doch sî iuch vore gesaget
0,801 ich wurde zuo – vüre iuch gên
0,802 sô ich von den tôde erstên
0,803 solte ich den tôt dâr umbe lîden
0,804 meister sô wile ich vermîden
0,805 daz ich dîn verlöugene niet
0,806 waz mir dâr umbe geschiet
0,807 Pêter dû – sicher sîn
0,808 daz dû drî stunte verlöugenest mîn
0,809 . êr . der hane zuo mitternacht
0,810 hât gekræjet als sîn gewoneheit stât
0,811 wer under iuch niet habe ein swert
0,812 der sal verkoufen balde sîn wert
0,813 sînen roc oder ander pfant
0,814 unde sal köufen ein swert zehant
0,815 hier sint zwei swert luoge
0,816 sô wole wir hân ir genuoge
0,817 waz wollent ir mir zuo guote tuon
0,818 ich verköufen iuch – – sun
0,819 gênt ir drî mit mir danne
0,820 die andern solent hier bestân
0,824 ir drî ich klagen iuch mîne nôt
0,825 mîne sêle ist trûric biz an den tôt
0,826 nû solent ir beten unde wachen
0,827 wollent ir den tiuvel widersachen
0,832 hêrre vater unde got
0,833 ist ez niet wider dîn gebot
0,834 sô überhebe mich disere pîne
0,835 iedoch ergê der wille dîn
0,836 des wile ich gehôrsam sîn
0,839 mohtent ir niet wachen eine stunt
0,840 mit mir nû sprach doch iuwer munt
0,841 ir wollent lîden durch mich nôt

0,842 ob ez wær der grimme tô
0,843 nû slâfent ir vile suoze
0,844 sô hât – unmuoze
0,845 wie er mich gebe der jüdischheit
0,846 nû slâfent . mir nâhet mîn arbeit
0,851a “hêrre vater”
0,851 hêrre vater unde got
0,852 ist ez niet wider dîn gebot
0,853 sô überhebe mich dirre pîne .
0,854 iedoch ergê der wille dîn
0,855 des wile ich gehôrsam sîn .
0,858 nû hoerent mich ire stolzen knaben
0,859 den ich küssen den sulent ir haben
0,860 unde vüerent in sicherlîche
0,861 daz er iuch iet entwîche
0,863 meister unde hêrre got grüeze dich
0,864 biut mir dînen munt unde küsse mich
0,865 wen suochent ir juden zuo disere stunt
0,866 wir suochen – daz sî dir kunt
0,867 suochent ir – suochent ir – daz bin ich
0,868 ir hânt in vunden sicherlîche
0,869 sehent wie ist uns geschehen
0,870 ich muoz mit ganzer wârheite jehen
0,871 wir vallen als wir trunken sîn
0,872 wole ûf ez ist schande daz wir hier lîn
0,873a “wen suochent ir”
0,873 wen suochent ir juden zuo dirre stunt
0,874 wir suochen – daz sî dir kunt .
0,875 ich sagen iuch rehte als . êr .
0,876 ir durfet mich niet suochen mê
0,877 wollent ir mich gevangen hân
0,878 sô lâzent mîne jungern gân
0,879 ouwê schanden unde schaden
0,880 mit den bin ich wole beladen
0,881 ich hân hier verloren mîn ôre
0,882 dâr umbe heizet man mich ein tôre
0,883 der grôze spot tuot mir vile wê
0,884 doch müejet mich der schade mê
0,885 Pêter tuo dîn swert wider in
0,886 wan dû – des sicher sîn
0,887 wer râche wile erwerben
0,888 mit swerten der wile verderben
0,889 vüerent mir her den wunden man
0,890 sîn ôre setzen ich ime wider an
0,891 meister ich biten dich
0,892 daz dû wolles heilen mich
0,893 dîn ôre setzen ich dir wider an
0,894 als ich wole meisterlîche kan

0,895 geselle lieber vriunt nim wâr
0,896 wie ez umbe mîn ôr var
0,897 ziuch hin merke ob ez vaste stê
0,898 wan ez tuot mir alzuô wê
0,899 dîn ôre stêt dir vast sicherlîche
0,900 geselle alsô dunket mich
0,901 – ist ein vile guoter man
0,902 er kan wole setzen ôren an
0,903 als lebe ich des bin ich gemeit
0,904 ich getuo ime niemer kein leit
0,911 ir koment zuo mir gewâfenet sêre
0,912 rehte als ich ein mordær wær
0,913 doch predigete ich iuch offenbære
0,914 in dem tĒmpel manke lêre
0,915 dû muost vore unsern meister gân
0,916 wie vile dû guotez habes getân
0,918 wir hân hier vore begangen
0,919 wie – wurde gevangen
0,920 nû merkent wie grôz herzenleit
0,921 – die reine maget leit
0,922 dô sie iren lieben sun
0,923 die juden sach übel tuon
0,924 dâ nâch gêt sancte Pêters nôt
0,925 wie er verswuore mit eiden gote
0,926 lânt iuch gên zuo herzen
0,927 unsers hêrren smerzen
0,928 den er mit willen geliten hât
0,929 vore unser aller missetât
0,930 wizzet ouch vûre die wârheit sunder wân
0,931 die die êwangelisten haben gelân
0,932 der wollen wir ein teil begân
0,933 wer uns verirret die mære
0,934 der müeze haben swære
0,936 – muoter reine
0,937 ich kome nû aleine
0,938 unde sagen dir übel mêre
0,939 die uns sint alzuô swære
0,940 die juden hânt den meister mîn
0,941 – den lieben sun dîn
0,942 gebunden unde gevangen
0,943 ich en weiz war sie sint gegangen
0,944 wan ich vile kûme dannen entran
0,945 dô in die vende griffen an
0,946 ouwê der jâmerlîchen mære
0,947 nû en weiz ich war kêren
0,948 dô ich gesehe mînen lieben sun
0,949 ouwê waz wel sie ime tuon
0,950 nû getet er doch nie bôsheit

0,951 er was in allen ie bereit
0,952 wie er ire siechn machete gesunt
0,953 ir vrouwen gênt mit mir zestunt
0,954 daz ich sehe wie ez ime ergê
0,955 wan mir geschach nie sô leide mêr
0,956 – dû wunderære
0,957 sage uns von dîner lêre
0,958 mîne lêre ist offenbâr gewesen
0,959 vrâge di dô sint gewesen
0,960 die tuont dir wole die rede kunt
0,961 daz ich sie lêrte alle stunte
0,962 daz dû niemer werdes vrô
0,963 wie antwürtes dû eineme vürsten sô
0,964 weiz iuwer keiner ein missetât
0,965 die dirre man begangen hât
0,966 die sal er uns hier sagen
0,967 daz wir sie von ime klagen
0,968 ich wile beziugen hier vüre wâr
0,969 daz er geredet hât offenbâr
0,972 ich wile beziugen hier vüre wâr
0,973 daz er geredet hât offenbâr
0,974 daz man den tÊmpel breche nider
0,975 sô wolte er in machen wider
0,976 in drîn tagen ganz als êr .
0,977 noch danne sprach er rede mê
0,978 er sprach er wære gotes sun
0,979 nû wartent waz wollent ir her zuo tuon
0,980 ich vrâgen dich ûf dînen eit
0,981 sage mir die rehte wârheit
0,982 bist dû des wâren gotes kint
0,983 dem himel unde erde undertân sint
0,984 jâ als dû nû hâst verjehen
0,985 dâr umbe solent ir gesehen
0,986 des mennischen kint mit grôzer gewalt
0,987 rehten über junc unde alt
0,988 waz tuot uns nû geziuge nôt
0,989 wan diser mennische schiltet got
0,990 dâr umbe er lîden sal den tôt
0,991 als uns Moses . êr . gebôt
0,992 dû maht wole – junger sîn
0,993 daz nimen ich ûf die triuwe mîn
0,994 dû tuost mir unreht
0,995 wan ich wart noch nie sîn kneht
0,996 dû maht wole – junger sîn
0,997 daz nimen ich ûf die triuwe mîn .
0,998 dû tuost mir unreht
0,999 wan ich wart noch nie sîn kneht .
0,1000a –[...]

0,1000 bist dû ein wîse prophête
0,1001 sô rât wer dir daz tæte
0,1002 dîn tôrheit dich nû melde
0,1003 dîne wîsheit ist zuo velde
0,1004 dû bist ir einer sicherlîche
0,1005 bî dîner sprâche erkennen ich dich
0,1006 dû bist von Galiles art
0,1007 ich sach dich dô er gevangen wart
0,1008 her nâher jô waz zîhent ir mich
0,1009 ich gesach in nie sicherlîche
0,1010 wollent ir des nemen mînen eit
0,1011 dâr zuo bin ich al gereit
0,1012a tunc cantet gallus et dominus respicet . Petrum . qui egressus fleat amare
0,1012b tunc Cayphas dicat
0,1012 wollent ir mit mir dâr nâch streben
0,1013 wie wir ime nemen sîn leben
0,1014 sô vüerent in vile gedrâte
0,1015 zuo den rihtær Pilâte
0,1016 unde tuont ime iuwer klage kunt
0,1017 sô richet er iuch zestunt
0,1019 ich hân gesunt âne wân
0,1020 daz ich – verrâten hân
0,1021 unschuldic ist sîn bluot
0,1022 nû sênt nement wider iuwer guot
0,1023 wan ich wile hine gâhen
0,1024 und wile mich selben hâhen
0,1025 dîne rede gêt uns niet an
0,1026 hâst dû übel oder wole getân
0,1027 daz wirstest dû hier nâch wole gewar
0,1028 wilt dû an die wide sô var
0,1029 bî – sî iuch kunt getân
0,1030 wie ir solent ruowen hân
0,1031 kein süntær dâr an verzwîveln sal
0,1032 got ist grôzer genâden vol
0,1033 hæte er sich niet erhangen
0,1034 gotes genâde hæte in entvangen
0,1035 merket mit zühten nû durch got
0,1036 ez gêt êrste an die rehte nôt
0,1037 – wir bringen einen man
0,1038 der wole mit zoubernisse kan
0,1039 dâr umbe wilt dû gerehte hân
0,1040 sô tuo ime den tôt an
0,1041 waz hât er übels getân
0,1042 daz er sal zuo buoze stân
0,1043 sîn übel werc . sîn übel gedanc
0,1044 uns dâr zuo gedwungen hânt
0,1045 daz wir in haben her brâht
0,1046 wir hæten ez anders niet gedâht

0,1047 ir solent mich baz vernemen lân
0,1048 wâr an er habe missetân
0,1049 er hât verboten überal
0,1050 daz niemann den keiser sal
0,1051 vürebaz sîne stiure geben
0,1052 dâr umbe hât er verworht sîn leben
0,1053 er nimet sich ouch des rîches an
0,1054 den keiser alsô smæhen kan
0,1059 bist dû der juden küninc vüre wâr
0,1060 des verjihe mir offenbâr
0,1061 jâ dû – wizzen sicherlîche
0,1062 daz ich hân ein künincrîche
0,1063 stüende daz nâch der werlte rehte
0,1064 sô hæte ich mîne knehte
0,1065 daz dû mîn hætes keine gewalt
0,1066 doch hât er sünden manicvalt
0,1067 der mich hât gegeben dir
0,1068 – des gelöube mir
0,1069 wizzet daz ich an disem manne
0,1070 keine sache vinden kan
0,1071 umbe die er sole lîden den tût
0,1072 doch bringen ich in in soliche nôt
0,1073 mit geiseln unde mit ruoten
0,1074 niet mê solent ir ime muoten
0,1075 nû dar ir vrenchen helde
0,1076 sint ir des muotes balde
0,1077 sô slahent in alsô sêre
0,1078 daz er niet habe mêre
0,1079 vernomen solich pîn
0,1080 daz tuont durch den willen mîn
0,1081 wizzet ûf mîne jüdischheit
0,1082 ich gelônen iuch wole der arbeit
0,1083 ir solent zweinzic marc hân
0,1084 wollent ir in mit vlîze understân
0,1085 er ist ein verzaget man
0,1086 der silber niet verdienen kan
0,1087 wirdet uns daz silber gegeben
0,1088 ich wæne ez koste sîn leben
0,1090 der juden küninc gegrüezet sî
0,1091 dem wonet swache êre bî
0,1096 nû sehent iuvern küninc an
0,1097 den vinden ich kein schult hân
0,1098 sô ist er ouch gar sêre geslagen
0,1099 dâr umbe mohtent ir wole gedagen
0,1100a –[...]
0,1102 dem keiser bieten wir êre
0,1103 keines küniges verjehen wir mêre
0,1104 waz tuon wir danne diseme manne

0,1105 der nie keine sünde hât getân
0,1107 dû – in kriuzigen alzehant
0,1108 wan er hât diz ganze lant
0,1109 verirret von – biz her
0,1110 sicherliche daz arnet er
0,1111 sît er von – ist
0,1112 sô vüerent in in dirre vrist
0,1113 zuo des landes rihtær
0,1114 dâ mite erbietent ir ime êre
0,1115 der ist iuch allen wole bekant
0,1116 Herôdes ist er genant
0,1117 als liep als wir dir sîn
0,1118 wirdet ervüllet daz gebot dîn
0,1119 willekome ir hêrren alle
0,1120 sagent mir waz iuch gevalle
0,1121 hêrre dô bringen wir dir einen man
0,1122 der allen die werlt verleiten kan
0,1123 der ist von dîneme lande
0,1124 – tete schande
0,1125 rihtær über in zuo dirre vrist
0,1126 wente dû hier gewaltic bist
0,1127 sît er mir die êre hât getân
0,1128 sô sal er mîne hulde hân
0,1129 wie vînt ich ime biz her was
0,1130 vile edel hêrre Panthias
0,1131 gênt sagent – mînen gruoꝝ
0,1132 unde nîgent ime an sînen vuoz
0,1133 umbe die hovelîchen tât
0,1134 die er gein mir begangen hât
0,1135 – rihtær lobelich
0,1136 der küninc Herôdes grüezet dich
0,1137 triuwe stede sicherheit
0,1138 sal dir von ime sîn bereit
0,1139 er ist der êren sô gemeit
0,1140 die dû hiute an in hâst geleit
0,1141 daz sagen ich dir ûf mînen eit
0,1142 hêrre ir sint ein guoter bote
0,1143 ir solent hân zuo botenbrôte
0,1144 hundert marc unde ein vile guot pfert
0,1145 noch danne sint ir bezzers wert
0,1146 ich hoffen ich werde nû gewert
0,1147 des ich lange hân begert
0,1148 daz ich – Marin sun
0,1149 ein zeichen sehe vore mir tuon
0,1150 nû tuo ez durch den willen mîn
0,1151 lâz mir ein zeichen werden schîn
0,1152 er mac wole sîn ein tôreht man
0,1153 sît ich gewalt über in nû hân

0,1154 daz er mich niet wile wizzen lân
0,1155 ob er zeichen machen kan
0,1156 nû tuont ime ein wîz kleit an
0,1157 unde vüerent in wider dannen
0,1158 der tôre ich alsô spotten kan
0,1160 ich wile iuch vrâgen ob ir ez begeret
0,1161 wâr umbe der küninc niet wart geweret
0,1162 daz er sô lange hât begert
0,1163 dô was er lîhte der genâden unwert
0,1164 ez mohte ouch ander sache wesen
0,1165 er hæte – lân genesen
0,1166 sô hæte sîne martel niet erlôst
0,1167 die mennischheit von der hellen nôt
0,1168 dâr an lît aller der werlte trôst
0,1169 ir klagent vile von diseme manne
0,1170 an den ich doch niet vinden kan
0,1171 dâr umbe er sole sterben
0,1172 sô spulgent ir ouch erwerben
0,1173 nû zuo iuwern ôstern alle jâr
0,1174 umbe einen gefangen daz ist wâr
0,1175 wollent ir ich lâzen iuch disen man
0,1176 oder den schâchær Barrabam
0,1177 dû solt lâzen Barrabam
0,1178 unde – uns henken disen man
0,1179 gar hôhe von der erden
0,1180 daz wir sîn ledic werden
0,1181 sô lâzent mich doch baz verstân
0,1182 waz iuch – habe getân
0,1183 waz solen wir dir sagen mê
0,1184 wan daz wir haben ein ê
0,1185 nâch der er lîden sal den tôt
0,1186 wan er hât gesmæhet got
0,1187 dâr umbe sal er sterben
0,1188 mügen wir daz erwerben
0,1189 ich wile dir sagen mêre
0,1190 mir ist getrôumet swære
0,1191 von – den guoten manne
0,1192 mohte ich nû einen boten hân
0,1193 den wolte ich schiere senden
0,1194 daz er mir solte entenden
0,1195 daz mîn hêrre in keine nôt
0,1196 viele durch des mannes tôt
0,1197 vrouwe ist ez iuwer wille
0,1198 sô ruofen ich her vile stille
0,1199 iuwer knehte Vrian
0,1200 vile wole er daz gesagen kan
0,1201 stolze dierne habe danc
0,1202 nû mache die rede niet lanc

0,1203 entbiut ime mit den botelîne
0,1204 daz er durch den willen mân
0,1205 – den vile guoten man
0,1206 lâze schaffen waz er kan
0,1207 Vrian guotez knappelîn
0,1208 louf balde zuo dem hêrren dîn
0,1209 sprich mîne vrouwe bite in sêre
0,1210 daz er sich niet vaste kêre
0,1211 an – durch gotes êre
0,1212 wan sîn tôt ist ir gar swære
0,1213 juncvrouwe die rede ist mir wole kunt
0,1214 ich wile loufen al zestunt
0,1215 hêrre mîne vrouwe heizet iuch sagen
0,1216 daz ir Jesum wollent gedagen
0,1217 wan sie lîdet grôze nôt
0,1218 in ireme slâfe umbe sînen tôt
0,1219 hêrre des alten wîbes troum
0,1220 – dû niet nemen grôzen goum
0,1221 dû – ez vûre die wârheit hân
0,1222 læs dû – dir entgân
0,1223 der keiser zûrnet ez wider dich
0,1224 wan er redet an daz rîche
0,1225 swer sich des künincrîches neme an
0,1226 des keisers unvriuntschaft muoz er hân
0,1227 wollent ir niet dâ von wenken
0,1228 ich sole iuvern küninc erhenken
0,1229 des hânt ir iemer schande
0,1230 swâ man ez saget in dem lande
0,1233 wir hân anders küninges niet
0,1234 als unser zunge hier verjihet
0,1235 wan des keisers sunder wân
0,1236 dâ von – dû disen henken lân
0,1237 wilt dû des keisers hulde hân
0,1238 sît ir mit übeleme muote
0,1239 stênt nâch des mannes bluote
0,1240 wie ir ime gewinnet daz leben an
0,1241 unschuldic wile ich sîn dâr an
0,1242 dâr umbe waschen ich die hende mân
0,1243 daz sal mir ein urkunde sîn
0,1244 gein gote unde aller mennischheit
0,1245 als mir sîn tôt ist harte leit
0,1246 die rede dunket uns gar guot
0,1247 über uns sô müeze komen sîn bluot
0,1248 unde über unser kindelîn
0,1249 dâr an – dû unschuldic sîn
0,1250 ich sprichen ein urteil als ich kan
0,1251 über – den guoten man
0,1252 mân urteil sal niet wenken

0,1253 an daz kriuze sal man in henken
0,1254 unde zwêne schâchær ouch bî im
0,1255 ir rihtær vüerent sie dort hin
0,1256 – dû kanst rihten wole
0,1257 die jüdischheit dir ez danken sol
0,1258 nû merke iegelîche vrouwe guote
0,1259 wie – wære zuo muote
0,1260 dô sie hôte unde sach
0,1261 ires lieben kindes ungemach
0,1262 sie leit mit ime er leit mit ir
0,1263 ir solent des gelöuben mir
0,1264 daz ime tet wîrs ire herzenleit
0,1265 danne sîn selbez arbeit
0,1266 stîc ûf man muoz dich henken
0,1267 des maht dû niet entwenken
0,1268 dû hâst uns leides vile getân
0,1269 daz wir dich hier entgelten lân
0,1270 dû predigete dîne lêre
0,1271 vile dicke ûf unser unêre
0,1272 daz sagen ich dir zuo swære
0,1273 trûtgeselle reine
0,1274 wir hân disen roc gemeine
0,1275 den hæte ich gerne aleine
0,1276 die rede ich sô gemeine
0,1277 daz wir daz spil beginnen
0,1278 “rudel ûf dem steine”
0,1279 wem er alsô gescheine
0,1280 wie vaste ein ander weine
0,1281 daz ahte er kleine
0,1282 die rede dunket uns guot
0,1283 wir hân alle den selben muot
0,1284 swer in nû mac gewinnen
0,1285 der trage in mit ime hinnen
0,1286 mîn gelücke hât niet geslâfen
0,1287 den würfel wile ich niet strâfen
0,1288 den roc ich eine gewonnen hân
0,1289 dâr umbe ich hier in vröuweden stân
0,1290 alle die werlt nû merken sol
0,1291 diser tet andern liuten wole
0,1292 mit sîner helfe manicvalt
0,1293 nû ist zergangen sîne gewalt
0,1294 wær er got als er . êr . sprach
0,1295 sô lîde er niet diz ungemach
0,1296 wolte er nû von den kriuze gân
0,1297 sô wolten wir sînen gelouben hân
0,1298 des muoz er uns aber erlân
0,1299 diser ist den ich hôte sprechen
0,1300 man sal den tĕmpel brechen

0,1301 sô wolte er in in drîer tagn vrist
0,1302 ganz machen als er ist
0,1303 nû sehent wie der meister stât
0,1304 der alsô grôze wîsheit hât
0,1305 bist dû gotes sun aleine
0,1306 sô hilf dir selben unde ouch uns zwein
0,1307 ouwê daz dû niet vûrhtes got
0,1308 in disere bitterlîchen nôt
0,1309 armer man waz spottes dû sîn
0,1310 wir zwêne lîden dise pîne
0,1311 billîche umbe unser missetât
0,1312 er ist der keine schulde hât
0,1315 hêrre erbarme dich über mich
0,1316 sô dû kumest in dînes vateres rîche
0,1317 dû – bî mir vûre wârheit
0,1318 noch hiute unde iemer âne leit
0,1319 in dem paradîse sîn
0,1320 bî mir unde bî den vater mîn
0,1321 mit dirre schrift tuon ich erkant
0,1322 wie sîn name wære genant
0,1323 unde ouch sîne wirdicheit
0,1324 nû – dû dâr zuo sîn bereit
0,1325 daz dû sie nâch dem willen mîn
0,1326 steckes zuo den höubeten sîn
0,1327 – hêrre sam mir got
0,1328 ich ervûllen gerne dîn gebot
0,1329 hêrre ale wêrlîche muoz ich leben
0,1330 die tavel ist geschriben uneben
0,1331 niet schrîbe daz er kûninc wære
0,1332 wan daz ist uns gar swære
0,1333 schrîbe daz er jehe offenbâr
0,1334 er wære unser kûninc daz was niet wâr
0,1335 waz ich nû geschriben hân
0,1336 bî wârheit daz muoz alsô stân
0,1337 sît daz nû niet mac anders sîn
0,1338 sô sî doch daz der wille dîn
0,1339 daz wir ime unde sînen genôzen
0,1340 ire gebeine zuostôzen
0,1341 daz sie iet wider unser ê
0,1342 an dem galgen hangen mê
0,1343 wan uns die ôsterlîche zît
0,1344 alsô nâhe ane lît
0,1345 – liebe muoter mîn
0,1346 Johannes sal dîn sun sîn
0,1347 unde dû Johannes guoter
0,1348 habe sie vûre dîne muoter
0,1350 warte wie er wüefet
0,1351 unde êly rüefet

0,1352 nû nement alsament wâr
0,1353 ob er zuo ime kome dâr
0,1356 ach hiute unde iemer mêre
0,1357 wie dürestet mich sô sêre
0,1358 nû trinc daz ist unser dranc
0,1359 dû sagest mir ez niemer danc
0,1360 ez ist mirre unde galle
0,1361 smacke wie ez dir gevalle
0,1364 vater ez sî dir erkant
0,1365 mîne sêle giben ich in dîn hant
0,1367 ich hân grôz wunder hiute gesehen
0,1368 bî den wunder kan ich spehen
0,1369 daz er vüre wâr was gotes sun
0,1370 dô die sunne ist undergangen
0,1371 sô kumet der tôten manige
0,1372 die lange sint gelegen tôten
0,1373 unde – hânt dâr vore er wære got
0,1403 vile lieber knabe suoche mir daz sper
0,1404 an – sîten ist mîn ger
0,1405 sô wile ich in durchstechen
0,1406 daz ime sîn herze muoz brechen
0,1407 sîn zouber wile ich sô rechen
0,1408 wie ist mir nû geschehen
0,1409 ich bin hier worden gesehen
0,1410 von des guoten mannes bluote
0,1411 die gesiht dunket mich sô guot
0,1412 daz ich in sîner minne
0,1413 got roube mich danne der sinne
0,1414 wile leben unde sterben
0,1415 dâ mite hoffen ich erwerben
0,1416 nâch mîneme tôde daz himelrîche
0,1417 wan er ist got des gelöuben ich
0,1418 – hêrre ich biten dich
0,1419 durch dîne zuht gewere mich
0,1420 daz ich – begrabe
0,1421 ob ich die loube von dir habe
0,1422 sô dunken ich mich ein sælic man
0,1423 ich gedienen ez gein dir sô ich bezziste kan
0,1424 sage mir die wârheit ist er tôten
0,1425 jô hêrre leider sô helfe mir got
0,1426 wilt dû in danne begraben
0,1427 des – dû urloup von mir haben
0,1428 genâde lieber hêrre mîn
0,1429 des wile ich iemer dîn dienær sîn
0,1430 ouwê vile lieber mîn sun
0,1431 waz sal ich arme vürebaz tuon
0,1432 ich hâte trôstes an dir vile
0,1433 dû wære mîner ougenweide spil

0,1434 des bin ich nû beroubet gar
0,1435 wan ich bin ane allen vrôuweden bar
0,1436 daz ich leider dîn mangeln sol
0,1437 ouwê wie wære mir sô wole
0,1438 ob ich daz mohte erwerben
0,1439 daz ich mit dir solte sterben
0,1440 ouwê der jâmerlîchen nôt
0,1441 mir ist mîn lieber meister tôt
0,1442 der mich von sünden banden
0,1443 unde von der werlte schanden
0,1444 mit genâden hât entbunden
0,1445 ouwê den sihen ich nû zuo stunten
0,1446 tôt hier vore mir hangen
0,1447 wie ist ez ime ergangen
0,1448 daz wæje mir hiute unde iemer mê
0,1449 sîn tôt tuot mîneme herzen wê
0,1451 hêrre – gip uns rât
0,1452 umbe eine nôt die uns ane gât
0,1453 wan wir hôrten disen man .
0,1454 sprechen daz er solte erstân .
0,1455 nû vûrhten wir sîn undertâne
0,1456 daz sie bî naht dâ hine gân
0,1457 unde in von dannen tragen
0,1458 unde danne die liute sagen
0,1459 er sî von dem tôde erstanten
0,1460 uns zuo grôzen schanden
0,1461 dâr umbe – dû durch unser guot
0,1462 dem grabe schaffen starke huote
0,1463 ich wile iuch râten als ich sol
0,1464 hûetent unde habent wole
0,1465 wie ir behaltent disen tôten man
0,1466 der sorge wile ich mich erlân
0,1467 ir stolzen rîtær wole gemeit
0,1468 wollent ir nû sîn bereit
0,1469 daz ir sîn pflegent mit huote
0,1470 des ich iuch mit guote
0,1471 gelône als ich solte
0,1472 wære iemannd der daz wolte
0,1473 silber pfenninge unde golt
0,1474 des geben wir ime rîchen solt
0,1475 wir haben alle solichen muot
0,1476 daz wir gerne tuon durch guot
0,1477 wilt dû uns geben hundert pfunt
0,1478 sô gên wir dir zuo dirre stunt
0,1479 unde hûeten sîn mit sicherheit
0,1480 daz in niemannd dannen treit
0,1481 nû hûetent sîn mit sicherheit
0,1482 die pfenninge solent ir hân bereit

0,1489 ir hellen vürsten tuont ûf die türe
0,1490 unde gebent mir mîne knehte her vüre
0,1492 wer ist der der dô boezet
0,1493 unde an die türe stoezet
0,1494 ich bin gewesen ûf tûsent jâr
0,1495 in dirre helle vürste vüre wâr
0,1496 daz ich gehôrte keinen stôz
0,1497 an dise türe sô rehte grôz
0,1500 tuont ûf der hêrre ist komen
0,1501 von den iuch wirdet benomen
0,1502 iuwer manicvaltige gewalt
0,1503 der ist gewesen alzuo alt
0,1504 ouwê der übelen mære
0,1505 die sint uns alzuo swære
0,1506 wir hâten vore grôze gewalt
0,1507 beide über junc unde über alt
0,1508 die wirdet uns hiute hier gevalt
0,1517 hêrre dû bist komen her
0,1518 wir dîn gebiten hân mit ger
0,1519 in dirre vinsterere manige stunt
0,1520 nû ist uns dîne helfe worden kunt
0,1521 des wir binnene wole vünv tûsent jâren
0,1522 vile jâmerlîchen wâren
0,1526 wole ûf ir solent âne swære
0,1527 vürebaz leben iemer mære
0,1528 bî mir unde bî den vater mîn
0,1529 dô solent ir mit vröuweden sîn
0,1531 ich hân eine salbe guot
0,1532 mit der hân ich ganzen muot
0,1533 daz ich den lieben meister mîn
0,1534 salben sole die wunden sîn
0,1535 nâch der juden gewoneheit
0,1536 dâr zuo hân ich die salbe bereit
0,1537 ob ir iet wollent mit mir gân
0,1538 daz solent ir mich wizzen lân
0,1539 – liebe vriuntinne mîn
0,1540 ist ez mit dem willen dîn
0,1541 sô wile ich gerne mit dir gân
0,1542 wan eine guote salbe ich hân
0,1543 die wile ich ûf in giezen
0,1544 ich hoffen es gein gote geniezen
0,1545 ich hân ouch den selben muot
0,1546 daz ich durch mîner sêle guot
0,1547 wolle zuo den guoten manne
0,1548 wan eine salbe ich ime gemachet hân
0,1549 die wile ich den vile guoten manne
0,1550 mit mînen henden strîchen an
0,1559 nû trahtent unde gebent rât

0,1560 wan ez uns kumberlîchen stât
0,1561 wie wir von dem grabe
0,1562 den stein gelegen abe
0,1563 wan wir sîn driu kranke wîp
0,1564 die niet hânt starken lîp
0,1565 dâ von sîn wir meide blôz
0,1566 sô ist der stein swær unde grôz
0,1567 mich dunket der stein sî abe
0,1568 geleit von dem grabe
0,1569 entriuwen mich dunket ouch alsô
0,1570 wære ez wâr des wære ich vrô
0,1573 ir trûrigen vrouwen sagent mir
0,1574 in diseme grabe wen suochent ir
0,1576 wir suochen hier in dirre vrist
0,1577 – der dô gekriuzigt ist
0,1582 den ir suochet der ist hier niet
0,1583 als iuwer ougen selbe sehent
0,1584 gênt unde sagent den jungern sîn
0,1585 daz sie ensament gên hin
0,1586 zuo – al zestunt
0,1587 dô wirdet er in allen kunt
0,1589 sage mir vrouwe mêre
0,1590 waz weines dû sô sêre
0,1591 wen suoches dû zuo disere stunt
0,1592 daz – dû mir machen kunt
0,1598 ich en weiz war mîn hêrre ist komen
0,1599 unde wâ er lît in disen stunten
0,1600 daz – dû mir nû sagen
0,1601 sô wile ich in dannen tragen
0,1607 niet en rüere mich ez sal niet sîn
0,1608 ganc balde zuo den jungern mîn
0,1609 unde sage in allen offenbâr
0,1610 daz ich erstanten sî vüre wâr
0,1611 wir sagen iuch gemeine
0,1612 unde dir Pêter eine
0,1613 daz unser hêrre – Krist
0,1614 von dem tôde erstanten ist